

**मंदोदरी**



# मंदोदरी

डॉ. आभा पूर्वे



ISBN : ९७८.८१.९६१४४६.१.६

प्रथम संस्करण

ई. २०११

द्वितीय संस्करण

२०२३

सर्वाधिकार ©

लेखिकाधीन

प्रकाशक

अंगिका संसद

सराय, भागलपुर

(बिहार)-८१२ ००२

E-mail : angikasansad@gmail.com

हरियाणा कार्यालय

वार्ड-३३, सेक्टर-२८

सरस्वती विहार, गुरुग्राम-१२२००२

आवरण-चित्र

www.wallpapercave.com से साभार

मुद्रक

Das Printer

गोविंदपुरी, दिल्ली।

मूल्य

पचास रूपये मात्र

---

**Mandodari (Poem)**

By Dr.Abha Purbey

Rs.50/-



माय  
जीवनलता पूर्वे  
के  
जे हमरो व्यक्तित्व के गढे में  
आय तांय तन-मन लगैते रहलौ छै

—आभा



## पहलों संस्करण से

### पुरोवाक्

ई तैहाकरोँ बात छेकै जबे अंगिका के महाकवि सुमन सूरु जी जीत्तो छेलै । हुनी जबे भी भागलपुर आबै तें हमरा कन जरूर आबै । एक दाफी हुनी आपनों प्रबन्ध काव्य 'सती परीक्षा' के पाठ सौंसे करलें छेलै । हमरी माय केँ ऊ काव्य एतन्है अच्छा लागलें छेलै कि हुनकोँ गेला के बाद माय नेँ हमरा सेँ कहलें छेलै कि तोरुहो हेने कोय काव्य लिखना चाहियौ, राम आकि सीता पर । बात ऐलों गेलों होय गेलै । आबें तें सुमन सूरु जी भी नै छै । एक दाफी हुनका सेँ माय के बात बतैनेँ छेलियै, तें हुनी कहलें छेलै कि अच्छा होतौं तोहें मन्दोदरी पर कोय काव्य लिखौं ।

मन्दोदरी पर हमरा की सामग्री मिलतियै । बाल्मीकि रामायण में एकरों जे चरित्र छै ऊ सचमुच में बहुत बढिया छै । बाद में हममें डॉ. अमरेन्द्र जी सेँ मनो के बात बतैलियै तें हुनी कहलकै तोहें विजेता मुदगलपुरी सेँ सम्पर्क करौं, हुनिये सामग्री दियेँ पारौक । सचमुचे में विजेता जी सेँ सामग्री मिललै आरु मनो के ऊ इच्छा पूरा होय गेलै । लेकिन जेन्हों चाहै छेलियै होनों नै होलै । सोचै छियै मन्दोदरी पर फेनु सेँ लिखबै । लेकिन जे लिखलें छियै ऊ तोरा सिनी के हाथों में सौंपी रहलें छियौं ।

—आभा पूर्वे

१ दिसम्बर २०११

शरतचंद पथ  
मशाकचक, भागलपुर  
८१२००१ बिहार

दूसरो संस्करण लेली

—आभा पूर्वे  
होली  
८ अक्टूबर २०२३

८ □ मंदोदरी



## मन्दोदरी

आय तोंय ने छों  
तेँ ई लंका  
केन्होँ सुनशान  
वीरान बनी गेलों छै;  
सरंग छूतेँ हजारों हजार हवेली में  
जेना कोय आदमिये ने रहें ।

सोना के राजमार्ग  
सोना के रास्ता  
सोना के घाट  
सोना के सीढ़ी  
सोना के बन्दनवार  
सब बेकार  
करिया अन्हार;  
जेना  
ऊ महावली के जलैलों लंका  
हठासिये जागी उठलों रहें  
जेकरा तोहें  
राते-रात पहले नाँखि गढ़वाय देलें छेलौ ।  
आय वही  
सोना के लंका

फेनू केन्हों कारों करिया  
बनी गेलों छै ।

सरंगों कें छूतें  
हमरों ई राजहवेली  
आइयो होने कें छै  
वहाँ रं हजार-हजार परिचारिका  
राज हवेली के बाहरो  
हमरों आदेश पावै लें  
बेकल,  
हजारों-हजार सेविका  
कहीं कोय कमी नै  
कमी छै  
तें एक बस तोरे  
जेकरा बिना की लंका  
की शृंगार  
सौंसे जिनगिये भार ।

स्वर्ण मंजूषा में ढकी कें  
तोरो वहा चट्टान नाँखि देह  
आबें चट्टान के नीचें  
राखी देलों गेलों छै  
कोय कालमात्र नाँखि,  
जेकरा आबें  
नै देखें पारतै  
कोय देवता  
कोय दानव  
कोय दैत्य  
कोय असुर  
कोय आर्य

सबसे अलग  
शान्त चित्त नाँखि  
अदृश्य काल नाँखि  
तोहें सुती गेलों छों  
पर्वत के हृदय में  
हेनों कि  
कालो वहाँ तक  
ने पावें पारें  
केकरो कल्पनो तांय  
नै पहुँचें पारें ।  
तबें  
ई मन्दोदरिये के पहुँच  
केना हुएँ पारतै वहाँ तांय !

कत्तो चाही कें  
कुछ नै करें पारों  
बस यही हुएँ पारें  
कि हम्में हुमड़तें रहैं  
तोरा लें, जिनगी भरी  
जिनगी के बादो  
—दूसरों जिनगी  
तेसरों-चौथों जिनगी तांय ।

आय हमरोँ पास  
हजारो-हजार परिचारिका छै  
मतरकि नै छै  
तें एक तोहें  
आरो हमरों बाबू  
दानव कुलोदभव मय  
जे आपनों बुढ़ारियों में

हजार सैनिक के ताकत  
असकल्ले राखै छैलै  
हुनकों हौ तेज छैलै ।  
आरो हमरों तोरा पावै के कांक्षा ही छैलै  
कि हुनी गेलों छैलै  
दानवेन्द्र मकराक्ष के सम्मुख  
बस यही एकटा निवेदन लेलें  
कि छोड़ी दौ  
रक्षधिय वैश्रवण रावण के  
कैन्हें कि हमरों बेरी मंदोदरीं  
मानी लेलें छै मनेमन  
हिनका आपनों पति ।  
मतरकि दानवेन्द्र मकराक्ष  
कहाँ तैयार होलों छैलै  
ई वास्तें,  
बस एतन्है हमरों बाबू से  
कहलें छैलै,  
“रावण तें हमरों जल देवता लेली  
बलि पशु छेकै  
एकरो आइये बलि पड़तै  
देवता खुश होतै,  
देवता खुश होतै तें  
हमरों प्रजा खुश होतै,  
हमरों सुम्बा द्वीप खुश होतै  
हम्में रावण के नै छोड़ें पारों  
बस पुरोहित के  
आबै भर के देर छै ।”

फेनू ब्यंग्य सें  
हमरों बाबू दिश देखतें कहलें छैलै

“रुकी जा, दनुपुत्र मय’  
रक्षाधि पति वैश्रवण रावण के पाविये कें जइयों  
बलिभाग पाविये कें जइयों  
आरों साथ-साथ ई  
दैत्यपुत्री के बलि भागो  
लेलें जइयों  
मन्दोदरी कें दे दियौ  
शायद देवता प्रसन्न होय जाय,  
तें रावणो से बढ़िया पति  
प्राप्त होय जैतै ।  
ऊ रक्षाधिप कें  
आपनों पति की बनैवों  
जे दानवेन्द्र मकराक्षण  
के प्राण चाहें;  
दानव-वंश के घाती छेकै,  
आरो ई सब जानतौ  
दनुपुत्र मय  
तोहें राक्षस कें  
आपनों बेटी के स्वामी  
बनाबै लें चाहै छों ।  
धिक्कार छों तोरा  
तोहें दानव नै  
राक्षस छों राक्षस ।  
आरो राक्षस लें हमरो पास  
एक दण्ड छै  
जे ई वैश्रवण रावण कें  
अभी-अभी मिलना छै ।”

तबें हमरों बाबू  
कुछ नै बोलें पारलों छेलै

कैन्हें कि हुनको सामना में  
हमरों कठुवैलों मुँह  
घूमी गेलों छेलै,  
हुनी लौटी ऐलों छेलै  
आरो आपनों ताकतों पर  
जौरों करलें छेलै  
हजारो योद्धा कें  
दानवेन्द्र के विरुद्ध  
आरो बलिस्तूप के चारो दिस  
हठासिये जुटी ऐलों छेलै  
काटी देलें छेलै  
हमरों भावी पति के  
सब बन्धन  
कहाँ से आवी गेलों छै  
हौ ताकत ।  
हमरों बाबू के देहों में !

एक दिश  
हमरों बाबू आपनों सेना लै  
दानवेन्द्र के सेना साथें  
लड़ी रहलें छेलै  
दूसरो दिश  
दानवेन्द्र मकराक्ष साथें  
वाश्रवण रावण  
हमरों होयवाला पति ।  
अद्भुत-अद्भुत  
रक्षाधिप के हौ तेज  
हौ वीरता,  
आय तांय नै देखलें छेलां ।

दानवेन्द्र  
जेकरो देहों में  
तीनों लोक के ताकत  
बसै छेलै,  
ऊ रणभूमि में  
छटपटाय कें  
गिरी पड़लौ छेलै  
रक्षाधिप के प्रहार सें।  
दानवेन्द्र मकराक्ष के मुँह से  
निकली रहलौ छेलै  
प्राण के पिटारा  
विलीन होय गेलौ छेलै  
हवा, पानी, आकाश, माँटी  
आरो आगिन में ।  
यैमें कांही कोय झूठ नै  
हम्मैं देखलें छियै  
आपनों आँखी सें  
हौ सबटा दिरीश,  
महाकाल जेन्हों नाचतें  
मुनिपुत्र वैश्रवण रावण कें  
तभिये तें  
जखनी हमरों बाबू  
हमरा लें जाय रहलौ छेलै  
राक्षाधिप के सम्मुख,  
हमरों मनो में  
केन्हों उछाह छेलै  
जना हमरों गोड़ों में  
सौ-सौ पंख लागी गेलों रहें,  
हुलसली-हुलसली  
पहुँची गेलों छेलियै

रक्षाधिप के सामना;  
किशोर मनो के उछाह के  
केन्हों नै  
रोके पारले छैले  
हमरो लाज आरो लेहाज ।  
आरो वहा दिन  
हम्मे जाने पारले छेलियै  
आपनो जन्म-कथा  
कि के छेकै मन्दोदरी ?  
के छेली हमरी माय ?  
कते दुखी छै हमरो बाबू !  
केकरो दोष ?  
हमरी माय के  
आकि हमरो बाबू के ही ?  
नै, नै  
हमरी मैये कहीं-न-कहीं  
दोखी छेलै ।  
आखिर  
एते स्वेच्छचारिता  
एते देहो के वशीभूत रहबा  
मर्यादा के रोआं रोआं के  
दुखैवै ही ते छेकै ।

नै समझे पारलकी  
हमरी मांय  
कि सब्भे स्वतंत्रता के  
एक सीमा होय छै  
जेकरो बाहर जैथें  
स्वतंत्रतो  
कलुषित होय जाय छै



ई बात मांय बुझियो जैतियै  
जों ऊ दानव वंश के होतियै  
दानव कुल  
जेकरों मर्यादा  
बात-व्यवहार  
चाल-चलन  
रीति-रिवाज  
रूप-शृंगार  
सौंसे दुनियाँ में अद्भुत छै,  
नै करै पारें  
कोय्यो जाति  
एकरो बराबरी  
है हमरो घमण्ड नै  
जलदेवता के अलकापुरियो  
एकरो चर्चा सें अघावै छै ।

हमरी माय  
सुम्बा द्वीप के होतियै  
दानव-वंश के बेटी होतियै  
तें की  
हेने करतियै ?  
हमरी माय तें  
अप्सरा कुल के छेली  
देवता के देलों दान  
तभिये तें  
चौदह साल साथ रहियो कें  
छोड़ी गेलै बाबू के साथ  
हमरो जन्म होलाहौ के बाद ।

ऊ नारी

सचमुचे में अप्सराहै कुल के होय छै  
जे देह के वशीभुत होय  
भटकै छै जहाँ-जहाँ  
नै मन वश में  
नै विचार वश में  
नै निष्ठा वश में  
भोग के मुर्ती बनी भटकें  
तें अप्सरे नी छेकै,  
ऊ कोय हुएँ  
हमरी माय हेने कैन्हे नी !

माय कहाँ समझलकी  
बाबू के मनो के बात  
छोड़ी गेली  
आरो बसी गेली जल देवता के घोर  
हाही के कभियो, काहूँ सद्गति नै छै ।

यहें हाही  
आवी गेलो छेलै  
हमरो पति रक्षाधिप में  
ऊ चाहें जनानी में रहें  
कि पुरुख में  
दोख तें  
दोनों कें लागै छै ।  
हमरी मांय तें खुद्दे  
जलदेव के घरों में जाय बसली  
आरो रक्षाधिप  
उठाय लै आनलकै  
दूसरा के जनानी  
आर्यकुल शिरोमणि के जनानी सीताहै कें

देह के ई इच्छा के  
जे दुर्गति होना छेलै  
ऊ तें होइये के रहलै  
कत्ते मना करलें छेलियै  
नै लड़ों आर्यकुल सें  
हम्में जानै छियै आर्यकुल के  
कैन्हें कि आर्यकुल तें  
हमरे बंधु-बान्धव छेके;

मतरकि  
रक्षाधिप केना सहतियै—  
वंश के बात छेलै  
कुल के बात छेलै  
आर्य आरो रक्ष के बात छेलै ।  
जबें आदमी के बीच  
जाति, वंश, कुल, धर्म  
आवी जाय छै  
तबें देश झुलसै छै  
सोना नगरिये नै  
प्रजा झुलसै छै  
राजाहै के प्राण नै जाय छै  
स्त्री के गोद उजड़ै छै  
ओकरो 'सुहाग' जरै छै  
ओकरो देह के लूट-पाट होय छै ।

युद्ध के आग बुझला के बादो  
आय केन्हों लागै छै, लंका  
जेना श्मशान जागी गेलों रहें  
मतरकि  
काहीं कोय योगी नै

खाली भूत-बैताल के छाया  
आरो हड्डी-पंजर के अंबार  
जेना काल  
सब्भे के चबाय  
चली देलें रहें  
एक हमरा अकेलें छोड़ी के ।

हजारो-हजार ई परिचारिका  
सेविका  
सब भूत-बैताल के छाया नांखि  
डोलै छै हमरों आगू-पीछू  
आरो हमरों रक्षाधिप  
सुती रहलें छै  
हमेशा लेली आँख मुनी के  
नीलम के चट्टान के नीचें ।

महाकाल के प्राप्त  
हमरों रक्षाधिप  
ओत्तें-ओत्तें लड़ाय के बादो  
की तोहें ने समझें पारलौ  
कि युद्ध  
आदमी के कुछ नै दिऐं पारें  
खाली महाविनाश के  
ई बात नै दानवेन्द्र के मालूम छेलै  
नै रक्षाधिप के  
तभिये तें  
सुम्बा के उजड़ी गेलें छेलै  
सुख-भाग ।

हाय हमरों मातृभूमि के सुख-भाग

जेकरों स्मृति अभियो मन-प्राण कें  
हिलकोरी दे छै  
सुम्बा के सोना  
हीरा-जवाहरात  
मोती-माणिक  
गाछ-बिरिछ  
समुद्र आरो लहर  
सब अभियो होने होतै  
मतरकि नै जानौं  
ऊ युद्ध के बाद  
आबैं वहां करों आदमी केन्हों होतै ?  
होन्हे होतै  
जेना कि ई लंका के छै  
जे जहाँ बचलों छै  
बिना प्राण के डोलते पुतला ।

के छेकै एकरो दोखी ?  
सोचै छियै  
तैं जी बेकल होय जाय छै ।

ऊ दिन  
जबैं रक्षाधिप के निष्प्राण देह  
हमरों सम्मुख लानलों गेलै,  
हठासिये केन्हों  
हहरी उठलों छेलै हमरों प्राण  
जेना माघ-फागुन के  
हरहरैतें डाल-पात

कत्तें फूटी-फूटी कें  
कानलों छेलियै हममें

ई कही-कही  
कि 'हे राक्षसेश्वर  
तोरा, युद्ध करे के पहिले  
समझैलें छेलियौं  
कि तोहें ऊ आर्यपुत्र सें नै लड़ों  
जे मन-प्राण सें  
आपनों स्त्री कें चाहै छै  
कहिनें कि ओकरो देहों में  
ओकरो स्त्री  
अदम्य मन-प्राण नाँखी बहतें रहै छै  
ओकरा युद्ध में  
के हरावें पारें !  
हे लंकाधिपति  
तोरा लें एक हम्मी मन्दोदरी होतियौं  
तें हमरो बात जरूरे मानतियौ  
नै मानलौ; ठानलौ युद्ध  
की होलै ?  
जे शरीर कें देखी  
यमराजो कें भय छेलै  
वही शरीर पर  
डोले छेलै यम के प्रेत  
सोना से लदलों देह  
मांटी आरो रेत!

आय एक हम्मी नै  
कै-कै मन्दोदरी  
हतभागिन बनलों  
आपनों-आपनों सोना के हवेली में  
बंदी छै,  
युद्ध के दुख तें जनानिये जानै छै ।

ऊ दिन  
जबें हममें हजार तीर सें बिंधलों  
तोरों शरीर कें देखलें छेलियों  
जना साही के शरीर रहें  
तें हमरा हठसिये  
ख्याल आवी गेलों छेलै  
तोरों वहा बलिष्ठ देह  
जेकरों गर्दन पर  
दस हीरा के माला  
हेने शोभै छेलै  
जेना तोरों दस शीश रहें;  
प्रतिबिम्ब  
जना प्रतिबिम्ब नै रहें  
विरोधी, मूड़िये समझी कें  
काटें  
दस शीश ।

के बतलें छेलै  
आर्यकुल श्रेष्ठ राम कें ई बात ?

आय तोहें हमरों पास नै छों  
तें याद आवै छै  
ऊ मधुयामिनी के बात  
हमरों रूप  
हमरों शृंगार  
हमरों हास-परिहास  
के अनन्य प्रशंसक  
तोहें केना  
काल के शिकार होय गेलौ ?  
धरती पर

के छेले तोरा नाँखी पराक्रमी  
तपी, ऐश्वर्यवान  
आर्यपुत्र सें कैन्हों केँ कम नै  
जो कमी छेलौं  
तेँ यहें कि—  
भोगे तोरोँ लेँ जीवन छेलौं  
सब तोरोँ लेँ  
तोरा सम्मुख कोय कांही नै,  
तही तेँ तोरा लेँ  
नै कुबेर छेलौं  
नै विभीषण ।

आबें लोगें जे कहों  
कि विभीषण कुलघाती छेले  
आरो कुबेर दंभी  
खोजला सें तेँ सबमें  
कुछ-न-कुछ दोख  
मिलिये जाय छै ।

देवताओ के दुख  
अलोपित होय जाय छै  
जो ओकरोँ व्यवहार  
स्त्री के प्रति वाम नै होय छै  
हे लंकाधिपति  
सब इन्द्रिय सें विरत होलौ पर  
तोहें मानों नै मानों  
तोरोँ ई चूक  
तोरा लेँ महाकाल बनी गेलै ।

आबें हमरोँ लेँ



ई सोना के लंका में  
छेवे की करै  
हमरा लें,  
नै हमरों दियोर  
नै ननद  
नै भैसुर  
न सेविका  
नै परिचारिका  
कोय कुछ नै।

कोय कुछ हुवौ नै पारें  
देश-देश सें  
लूटी कें लानलों गेलों  
ई अपार धन  
सोना  
चांदी  
हीरा-जवाहरात  
की लंका के लब्बों अधिपति कें  
ललचैतै नै  
नया लंकेश्वर कोय्यो बनें  
विभीषण  
आकि कुबेर  
फेनू होतै स्त्री आरो सम्पत लें युद्ध ।

अपार धन आरो वैभव के मोह  
भला केकरौ चित्त कें  
शांत रहै दै वाला छै की ?  
वहू में  
जे देशों में  
किसिम-किसिम के लोग बसें

कोय दैन्य कुल के  
कोय असुर कुल के  
कोय दानव कुल के  
सब-के-सब  
बनैलों गेलों बन्दी;  
भला की सोचतै  
ई देश के हित ।

बान्ही-छान्ही कें बनैलों  
भला के भगत बनलों छै !  
एक लंकेश्वर की मरलै  
दूसरों  
लंकेश्वर होय लें तनलों छै,  
आरो फेनू  
जे जहाँ बचलों छै  
जौन-जौन सोना के हवेली में  
दिवंगत लंकेश्वर के  
विधवा रानी सब,  
सब बनी जैतै  
देखतें-देखतें  
नया लंकेश्वर के रानी  
युग-युग के कहानी ।

हमरा नै रहना छै  
ई वैभव-विलास के  
माया नगरी में  
जहाँ आदमी के धर्म सें बढी कें  
आदमी के वैभव छै  
आदमी के ताकत छै  
जहाँ दास आरो स्त्री

एक्के रं मानलों जाय,  
बात-बात पर  
ओकरोँ ऊपर  
मुक्का तानलों जाय;  
वहाँ आरो सब के वास हुँ पारें  
आत्मा केना बसतै ।

हमरोँ देश  
हमरोँ दानव बंधु !  
जेहनों दिव्य देह  
होने मोँन आरो मस्तिक !  
जेकरोँ नै तें  
ज्ञान के बराबरी  
नै विचार के  
नै संस्कृति के  
नै संस्कार के  
नै व्यवहार के !

फूल के सुगन्ध सें  
बेकल हुवै वाला दानव  
फूले जकां मोँन राखै वाला दानव  
फूले लें सोचै वाला  
हमरोँ द्वीपवासी  
संगीत आरो नृत्य में रमै वाला  
हमरोँ देशवासी !  
अमृत के वाणी पैलें छै  
हमरोँ सुम्बा !  
आय लागै छै  
कत्तें युग बीती गेलै  
आपनों देश देखलों होलों ।

आह  
हमरों देश  
हमरों द्वीप  
हमरों सुम्बा  
जहांकरो राजो  
विपत्ति पड़ला पर  
सैनिक साथें युद्ध करे पारें  
आपने नै  
पड़ोसी देशो लें  
मरें-खपें पारें,  
जहांकरो बूढ़ों-बाप  
बेटी लें  
सब दुख सहें पारें,  
युद्ध करे पारें  
आरो शांति सें मरें पारें !

वहा देश में  
हम्में लौटी जैबै  
वहांकरो पछुवा हवा  
हमरा बुलाबै छै  
खेत-खलिहान में अनाज ओसैतें  
दानव कन्या के हँसी हंकाबै छै  
जेना  
जोर-जोर सें  
हंकैतें रहें समुद्र के शोर  
लहरों के संगीत अछोर  
खुली कें खेलै लें  
हांसै लें  
नाचै लें  
ऊ आत्मा नांख

जे राजसी-तामसी बन्धन से  
मुक्त हुए ।

होन्हैं कें आबें  
हमरों लें की बचलों छै ई लंका में  
जिनगी कथी लें काटबों  
शंका में  
सहमी-सहमी कें  
डरी-डरी कें  
जीते जी मरी-मरी कें ।

हमरों ऊ विश्वास तें  
वहा दिन मरी चुकलों छै  
जबें हममें देखलें छेलियै  
तीनो लोक  
तीनो देवता  
तीनो शक्ति कें  
भयभीत करै वाला  
की रं लहू सें लथपथ छेलै;  
जे भुजा पर  
हमरा ओतना विश्वास छेलै  
ऊ टुकड़ा-टुकड़ा में  
कहाँ-कहाँ गिरलों छेलै  
नै जानौ  
तबें हममें सपनौ में  
नै सोचलें छेलियै  
कि मृत्यु  
समय पुरला पर  
केकरो नै छोड़ै छै  
नै देवता के

नै दानव के  
तबे रक्षाधिपे के केना छोडतियै ।

अच्छा होतै  
कि आरो कोय विश्वास  
हमरो साथ छोड़ी दे  
नीलम चट्टानो के नीचे  
चिर निद्रा में सुतलो  
हे हमरो प्राण  
हम्मे क्षमा चाहै छी ।



**डॉ. अमरेन्द्र**

लाल खां दरगाह लेन,  
सराय, भागलपुर,  
८१२००२ (बिहार)

आभा जी,

मैंने 'मन्दोदरी' की पांडुलिपि पढ़ी । लम्बी कविता के रूप में यह लघु प्रबन्ध ही है । आपने मन्दोदरी के बहाने जिस तरह से युद्ध, स्त्री, देश और जाति समस्या पर विचार कर लिया है, उससे तो इस लघु प्रबन्ध की गरिमा ही बढ़ गयी है । 'मन्दोदरी' काव्य का यह आन्तरिक संसार बाहरी संसार के लिए बड़ा उपयोगी सिद्ध होगा, ऐसा मेरा विश्वास है । और ऐसे ही काव्यःसृजन से अंगिका का भी मान बढ़ेगा । इस सुन्दर लघु कृति के लिए आपको बधाई ।

**—अमरेन्द्र**

२ अक्टूबर २०११

## आभा पूर्व : एक संक्षिप्त परिचय

- जन्म तिथि : २३ अक्टूबर १९६४ ई.  
जन्म स्थान : भागलपुर  
माता का नाम : जीवनलता पूर्वे  
पिता का नाम : रूद्रदत्त पूर्वे  
शिक्षा : एम.ए.(गोल्ड मेडल), पी-एचडी  
प्रकाशन : देश भर की विभिन्न पत्र-पत्रिकाओं में रचनाएँ प्रकाशित  
संकलनों में रचनाएँ : चम्पा फूलै डारे डार, आधुनिक अंगिका काव्य कोश, हे दशरथ के राम आदि दर्जनाधिक संकलनों में रचनाएँ प्रकाशित  
सम्पादन : 'नया हस्तक्षेप' (अनियमितकालीन पत्रिका) के अलावा १. गीत-गंगा (अंगिका गीत संग्रह), २. नवगीतकार मधुसूदन साहा, ३. अर्द्धनारीश्वर (हिन्दी कहानियों का पंजाबी अनुवाद), ४. जीवनलता पूर्वे : शांत नदी की अनंत यात्रा (अंग महिला साहित्यकार संसद, भागलपुर) ५. अंगिका लोकसाहित्य : एक अध्ययन (अंगिका संसद, भागलपुर), ६. केकरोँ चाँद केन्हों चाँद (अंगिका संसद, भागलपुर), ७. खोई हुई लड़की का खत (अंगिका संसद, भागलपुर), ८. डॉ. अमरेन्द्र : व्यक्तित्व और वागर्थ (कामायनी, भागलपुर), ९. डॉ. अमरेन्द्र : संदर्भ और साहित्य (समीक्षा प्रकाशन, दिल्ली)  
प्रकाशित पुस्तकें : १. अंतहीन वैतरणी (अंगिका उपन्यास), २. गुलबिया (अंगिका उपन्यास), ३. कुँवर विजयमल (हिन्दी उपन्यास), ४. चन्दन जल न जाए (कहानी-संग्रह), ५. शरीष की सुधा (कहानी-संग्रह), ६. जब-जब झरे शृंगार (दोहा-संग्रह), ७. गुलमोहर का गाँव (कविता-संग्रह), ८. नागफनी के फूल (गजल-संग्रह), ९. शिशिर की धूप (कविता संग्रह), १०. नमामि गंगे (कविता-संग्रह), ११. ताँका शतक, १२. मंदोदरी (अंगिका प्रबंध काव्य)  
सम्पादनमंदोदरी : शरतचंद पथ, मशाकचक, भागलपुर (बिहार)